



### Reglur um afslátt á fasteignaskatti

#### 1. grein

Reglur þessar gilda um lækkun fasteignaskatts, skv. heimildarákvæði í 5. gr. laga nr. 4/1995 um tekjustofn sveitarfélaga, að hluta eða að fullu, hjá þeim eigendum fasteigna sem lögheimili eiga í Norðurþingi, og náð hafa 67 ára aldri eða hafa verið úrskurðaðir 75% öryrkjar fyrir upphaf álagningarárs. Ef um hjón eða fólk í skráðri sambúð er að ræða, ræður aldur þess sem fyrr verður 67 ára eða úrskurðaður öryrki, án tillits til skráningar í fasteignaskrá.

#### 2. grein

Reglur þessar taka einungis til lækkunar fasteignaskatts, eins og hann er skilgreindur í 3. gr. laga nr. 4/1995 um tekjustofna sveitarfélaga, en ekki til ýmissa fasteignatengdra þjónustugjalda, s.s. vatns-, holræsa- og sorpgjalda.

#### 3. grein

Þeir sem náð hafa 70 ára aldri fyrir upphaf álagningarárs, skulu fá fasteignaskatt af íbúðarhúsnæði, sem þeir eiga og búa í, felldan niður að fullu.

#### 4. grein

Þeir sem náð hafa 67 ára aldri, eða verið úrskurðaðir 75% öryrkjar, fyrir upphaf álagningarárs og njóta fullrar tekjutengingar frá Tryggingastofnun ríkisins, skulu fá fasteignaskatt af íbúðarhúsnæði sem þeir eiga og búa í, felldan niður um 50%.

#### 5. grein

Þeir sem náð hafa 67 ára aldri, eða verið úrskurðaðir 75% öryrkjar, fyrir upphaf álagningarárs og njóta skertrar eða engrar tekjutryggingar frá Tryggingastofnun ríkisins, skulu fá fasteignaskatt af íbúðarhúsnæði sem þeir eiga og búa í, felldan niður um 25%.

#### 6. grein

Við fráfall maka eða sambýlings skal fasteignaskattur af íbúðarhúsnæði sem fjölskylda hins látna/hinnar látnu á og býr í felldur niður að fullu fyrsta árið eftir fráfallið og að hálfu annað árið.

#### 7. grein

Búi einstaklingur (eða hjón) inni á heimili ellilífeyrispega sem ekki er maki hans og fellur ekki undir reglur þessar, kemur ekki til niðurfellingar fasteignaskatts.

#### 8. grein

Falli aðstæður ekki undir ákvæði reglna þessara skal bæjarráð úrskurða um lækkun eða niðurfellingu.